



新疆吐魯番廳鄉土志

地610.21

1539.1



新豐吐魯番直隸廳鄉土志



新疆吐魯番廳鄉土志敘



鄭康成注周禮採用漢法凡制度禮器載於祕府故書者代遠而難稽復摭拾民間傳寫不同之今書以相況蓋耳所常聞目所常見其事近其言足信也論地理則攷司空郡國輿圖論戶口則核鄉籍戶版八月案比而造書下至涼州烏翅南郡雀羽中山冬釀東海乾鱗伊維素質曰暈江淮青質曰搖藍菡象斗之屬步籙假紒之製康成皆以目驗知之其見諸問答者復編為鄭志漢承周後多得古

法康成囊括大典不遺鄉閭瑣屑事偉然成一代儒宗嗚呼盛矣我

朝銳意興學京師設編書局飭各直省府廳州縣采輯鄉土志以為小學課本是即周禮師氏三德三行保氏六藝六儀之法其政教禁令受之司徒退而頒於鄉吏三年大比興賢選能若舉茂才若舉孝廉合聚而尊寵之今世畢業授官羣豔其名曰新學其實皆周官古制也火州僻處荒裔向無志乘及私家著述可資攷證又兵燹後文牘散

佚殆盡炳燿下車伊始簿書餘暇間循行鄉社呼二三耆
老席地與語詢諮風土推表山川地廣俗雜大率愚悍少
慮然田肥美掘井澆灌有黍麥梁菽蒲桃草棉果蔬之饒
氣候炎歊食物常足故皆窳偷生而鮮蓄聚爰擬大畧隨
筆記載積兩月而書成文獻所難徵者輒訪鄉里近事以
實之亦猶康成注禮以今況古之意云爾光緒丁未夏五
吐魯番廳同知曾炳燿謹撰

新疆吐魯番廳鄉土志

歷史

吐魯番廳在漢為車師前王庭車師服屬匈奴漢屢征之武帝天漢二年以匈奴降者介和王為開陵侯引兵擊車師不利征和四年再遣開陵侯合六國兵擊之遂臣於漢昭帝時匈奴復田車師宣帝立遣五將軍擊匈奴田者驚去車師王烏貴立遮漢道地節二年遣鄭吉等攻車師交河城破之得其王單于乃立兜莫為車師王收民東徙漢

益遣士屯焉元康二年匈奴擊車師田者田卒少不能守立車師故太子軍就為王徙其眾渠犂地歸匈奴王莽時匈奴大擊北邊西域反解明帝永平十六年漢取伊吾前五內屬又降北虜十七年竇固破白山戎擊降後部前部亦降和帝永元二年遣子入侍三年置戊己校尉居前部高昌壁八年王尉卑大為後部所攻虜其妻子九年長史王林斬後部王涿鞬前部事漢愈謹安帝延光中班勇為西域長史屯柳中

又名柳谷本狄胡舊國

魏仍置戊己校尉晉初車

師王居交河而高昌為校尉治成帝咸和初前涼張駿置
西域長史而戊己校尉趙貞不附擊禽之以其地為高昌
郡立田地縣及校尉營見張駿傳孝武太元以後苻秦加車師
前部王彌寔為平西將軍西域都督並置高昌太守後涼
北涼皆因之北魏太武帝延和中以焉耆東部帥車伊洛
為前部王涼州人闕爽自為高昌太守太平真君初北涼
亡沮渠無諱跳據鄯善而伊吾土唐契為蠕蠕所逼亦擁
眾西走白力城乃白棘之訛即今關展遣弟和攻高昌闕爽詐降於

無諱欲令與唐契相擊契為蠕蠕攻殺爽拒無諱無諱將

衛興奴宋書作衛察屠其城爽奔蠕蠕無諱留高昌奉表於宋

文帝拜為西夷校尉涼州刺史河西王高昌有王自此始

真君五年無諱死弟安周代也橫截城唐和攻拔之又克

高寔疑即高昌白力二城表狀於魏世祖詔和與車伊洛從萬

度歸討焉耆伊洛留子歇守城安周乘隙引蠕蠕圍歇陷

之真君十一年伊洛收遺民奔焉耆車師前部至是亡唐

和亦自焉耆歸魏越十載蠕蠕滅安周立闕伯周為高昌

王太和初伯周之子相仇殺為高車王可至羅元和志作阿伏至羅

所滅立張孟明為王國人殺之立馬儒二十一年儒欲東

徙伊吾其下不願復弑之而立麴嘉兩臣於蠕蠕高車兼

貢中國正光中堅堅立西魏大統中子元嘉周書作元喜立恭

帝二年以田地公茂嗣位隋初嘉六世孫伯雅立為突厥

所攻令變法從突厥大業中裴矩往敦煌遣使說伯雅來

朝封弁國公尚宗女華容公主歸蕃後下令國中解辦削

社取悅煬帝然伯雅又臣於鐵勒實不敢改也其國有四

十六鎮交河田地高寘臨川橫截柳婆洿林新興由寘始

昌篤進白刀南史作白刃等皆其鎮名也據梁唐武德初伯雅

死子文泰嗣貞觀四年入朝尋阻貢道助西突厥擊焉者

十四年命侯君集等討之文泰悖死子智威降太宗欲列

為州縣魏徵諫不納置西州初號西昌州領五縣高昌柳中交

河天山蒲昌見新唐書西域傳尋升安西都護府歲調千兵謫罪

人以戍褚遂良諫不省二十二年徙都護於龜茲高宗永

徽初都護還治高昌顯慶三年復移都護治龜茲改置西

州都督府開元中曰金山都督府並置天山軍天寶元年
改交河郡乾元元年復為西州德宗貞元六年吐蕃陷北
庭節度使楊襲古奔西州為回紇所殺西州固守無援久
之亦陷於吐蕃宣宗大中時吐蕃衰弱號稱收復懿宗咸
通七年回鶻大酋僕固俊自北庭取西州為西州回鶻旋
分三部曰和州回鶻曰阿薩蘭回鶻曰高昌均服屬於遼
兼貢於宋於金高昌王并有北庭蓋諸部推高昌為渠也
後西遼又封吐谷渾之裔畏兀兒於交河其酋曰月仙帖

木兒名亦都護號王傳子巴而朮阿而忒太斤西遼主遣使
監其國巴而朮阿而忒殺之而降於元太祖使尚公主亦
作輝和爾國伊都呼時高昌阿薩蘭並存尋并入畏兀兒
三傳為大赤哈兒的斤至元十二年都哇破火州徙屯於
哈密力旋為北軍所殺於是政令歸朝廷至元中所設官
有霍州一作和州火畏兀州皆諧聲也按察司鎮北庭都護府和州宣
慰司仁宗封紐林的斤為高昌王三尚公主還火州復立
畏兀兒城池傳子帖木兒補化泰定初召入朝元末分為

柳城火州吐魯番三部皆設萬戶府達魯花赤明初仍舊稱萬戶正統後并於吐魯番其酋居安樂城自稱速檀亦僭稱王屢破哈密瓜沙犯肅州嘉靖之季兄弟相爭勢漸衰弱隆慶初稱速檀者四人

國初吐魯番有五種部落華見東錄順治三年遣都督瑪薩朗琥伯峯等入貢稱蘇勒檀阿布勒阿哈默特阿濟汗六年其黨哈什克伽助逆回丁國棟為亂遣兵斬之絕其貢使十年復叩關請貢十二年用葉爾羌酋名悔罪乞貢納之

定貢期五年一至康熙十二年貢表稱禡木特賽伊特汗署一千八十三年用回教紀元也二十年表稱阿布勒穆咱帕爾蘇勒檀瑪哈瑪特額敏巴圖爾哈什汗二十五年表稱臣成吉思汗裔承蘇賚滿汗業此蓋由蒙變回之證五十九年散秩大臣阿喇衲擊破齊克塔木降皮禪城吐魯番之阿克蘇爾坦及總管沙克札柏爾率眾迎降別有頭目阿濟斯和卓走策妄阿喇布坦所明年率準夷來脇吐魯番數千戶徙喀喇沙爾脫歸千餘戶聚魯克齊穆推

托克托瑪木特為酋拒準夷遣使內附靖逆將軍富察安益阿喇納兵四千往守九月準夷二千來侵擊卻之授阿喇納為協理將軍令興屯馬雍正元年都統穆森代之三年策妄阿喇布坦乞和求得吐魯番地纏回願內徙者六百五十餘戶四年安置金塔寺威虜堡諸地仍以托克托瑪木特為長留魯克沁者尚萬數以阿淖爾敏和卓為長五年吐魯番回目白斤伯克請入貢

上以我師難於庇護聽自便不强其歸順八年寧遠大將軍岳鍾琪以己意遣官往購糧啟敵釁九年三月準夷侵吐魯番護理大將軍四川提督紀成斌令總兵樊廷率二千人往援賊遁師旋四月賊圍魯克沁額敏和卓力守四旬不下復攻哈喇和卓回眾拒斬五百級岳鍾琪令總兵張元佐曹勳等以三千人往救賊遁七月又來侵副將王廷瑞擊走之十年夏噶爾丹策凌遣宰桑額爾克得松攻喀喇和卓參將劉廷炎戰卻之九月護理大將軍事副將軍張廣泗奏吐魯番防兵八千五百人分駐七邑請徙兵

民聚居魯谷慶哈喇火州皮禪洋海以便防範十月封額敏和卓為札薩克輔國公徙其民萬餘口於塔勒納沁十一年復徙之瓜州乾隆二十年額敏和卓從征伊犁加封鎮國公時吐魯番遺民千四百餘戶有伯克莽噶里克者偕其弟以戶籍迎降於定西將軍永常所同時定北將軍班第奏吐魯番舊酋莽蘇爾為元太祖裔今在喀喇沙爾應遣歸廷臣恐與額敏和卓不相安寢其議二十一年額敏和卓奏吐魯番不復有蒙古裔瓜回願歸故土從之莽

噶里克請視額敏和卓編旗隊

詔封公爵割吐魯番西境自伊拉克至阿斯塔克與之尋貳於巴雅爾額敏和卓拒賊固守加封貝子二十二年安西都督傅魁進軍鹽池莽噶里克恨準夷誅求無厭戢十人迎降魁欲邀功擅殺之以擊斬告事覺誅魁宥莽噶里克妻孥其地統屬額敏和卓加貝勒品級

吐魯番舊作上爾番至是

易今明年從靖逆將軍雅爾哈善討霍集占授多羅貝勒兼叅贊大臣克庫車加郡王品級二十四年從定邊將軍

兆惠討平葉爾羌晉封郡王留葉爾羌辦事設關展辦事
大臣及同知三十六年威虜堡回民西歸以千戶珈如拉
百戶伊明和卓為五品伯克其莽噶里克等屬戶亦分設
伯克領之皆隸關展大臣轄二十七年免吐魯番納糧以
哈喇和卓托克遜屯田給回民為世業四十三年額敏和
卓卒次子素賚瑪襲四十四年以罪削爵弟伊斯堪達爾
嗣改關展辦事大臣為吐魯番領隊大臣移同知都司來
駐四十六年築廣安城五十三年

詔吐魯番世襲封爵不必降等又四傳至阿克伊都同治
三年在葉爾羌禦賊被執是年夏庫車叛酋伊薩克和卓
東竄漢裝回響應領隊大臣榮慶死之尋為迪化漢裝回
所據九年二月安集延纏回來爭迪化回殺吐魯番纏回
千計四月安集延帕夏胡什伯克率眾數萬復仇揚言助
中國討賊八月迪化賊酋遣馬仲乞和復劫帕夏營帕夏
怒擊破吐魯番諸城殺迪化賊黨殆盡築新壘以降者馬
人得等守之時哈密大臣文麟景廉齎檄諭帕夏納土而

帕夏已西還矣光緒二年帕夏次子海古拉守托克遜陝
回白彥虎降於帕夏助守吐魯番種族不一陽合陰離纏
回不堪安夷之虐咸願歸順三年三月統領湘軍劉錦棠
討平之七年以阿克拉伊都之子瑪木特襲郡王十年重
修漢城罷領隊大臣以同知及遊擊治之廳治原隸甘肅
回城及闕展城各設巡檢十二年改隸新疆二十九年升
闕展巡檢為縣改名鄯善為吐魯番廳屬邑焉

按吐魯番之番纏回呼若潘乾隆時此邦回人徙烏什
者以其故鄉之名名烏什曰圖爾瑞瑞即潘字之對音
也蓋西州於晚唐為吐蕃所據疑其時呼為吐蕃城音
轉為吐魯番耳近人以蒙語回語釋之非探本之論唐
書吐蕃傳之蕃字亦當讀如潘吐蕃故國漢人呼為西
藏番俗不知此號惟自呼曰圖伯特或曰條拜提曰退
擺特歐洲人呼為替卑得其伯字拜字擺字卑字皆蕃
字之轉音亦即蕃當讀潘之證也又按漢地志魯國蕃
縣應劭曰音皮師古曰土俗各有別稱不依本字此又

蕃字不必讀方煩切之證也

政績

吐魯番古稱南路腴區兵燹後河道枯竭原隰龍鱗半淪
瀚海舊雖開有坎井而地方遼闊灌溉難周道光間故雲
貴總督林則徐因洋務遣戍在廳西百五十里之托克遜
及伊拉里克等處修濬河道廣溉民田加開坎井以輔河
水之不足前伊犁將軍彥泰奏增新賦二十萬兩有奇惜
其功未告歲而賦額已加多焉同時有藩司黃冕者亦遣
戍來此大興伊拉水利至今父老感懷往事緬述殊勞猶
深以林黃當日未竟其事為憾此外官斯土者雖不乏人
而於興利除害聽訟諸大端遠者既無實蹟可稽近者又
無奇異足錄故政績闕如

兵事

西域控天下上游而吐魯番實南疆門戶自來西羌北狄
互為要結其取道率在葱河蒲海間而九鎮三邊卒以次
疊被其害漢開西域都府以斷右臂而匈奴執狄唐置北

庭節鎮以席上腴而突厥形弱我

朝準夷橫踞回逆負嵎

高宗純皇帝殲除準回兩部設重藩於伊犁葉爾羌而後
邊庭息烽燧之警者幾二百載咸同間逆回金相印勾結
安集延頭目阿古柏同時煽亂關內悍回白彥虎應之同
治三年土回馬漚等焚掠東四城烏魯木齊都統平瑞聞
警發兵往至蘇巴什盡殲於賊而烏垣亦亂逆回竄擾吐
魯番領隊大臣榮慶守禦十餘日會纏回皆變城遂陷逆

酋阿古柏狡黠能用眾收諸部餘燼自稱和碩伯克吐魯
番闢展以西土回皆應之號為帕夏帕夏者伯克轉語也
十二年十月都統景廉擬三路規取烏垣命張曜由天山
趨吐魯番光緒二年六月大軍克復烏垣是時帕夏踞托
克遜三城白彥虎余小虎以敗往待之甚倨令率其眾傍
三城而居左宗棠檄張曜嵩武軍道奇克騰木向闢展徐
占彪蜀軍出木壘河與張曜夾攻吐魯番三年三月丁巳
朔大軍並趨吐魯番七克騰木者吐魯番門戶也賊築壘

拒守議先攻之癸亥會軍四面凌城賊奪門出奔闕展乙
且乘勝攻闕展賊望風遁安逆聞敗招集闕展賊踞魯克
沁勝金台諸處欲併吐魯番守賊致死一戰戊辰連克魯
克沁勝金台會軍喀喇和卓城東己巳師至吐魯番城外
十餘里賊列陣拒守適劉錦棠遣湘軍自北路至合攻之
遂會克滿漢兩城釋本城纏回萬餘令復業按賊竄北路
以南路之達坂城托克遜為總要賊竄東路以西路之闕
展七克騰木鹽池為總要吐城既克劉錦棠以三月壬戌
克達坂城時帕夏次子海古拉守托克遜丁卯錦棠自達
坂西南進搗托克遜戊辰抵小草湖大隊長驅而進賊棄
城走遂復托克遜城初帕夏聞北路已平知官軍必下南
路與白逆移達坂新城於兩山間堅厚異常以大通哈守
之大通哈者猶華言大總管也又以次子海古拉據守托
克遜扼南路總隘亦築兩城相犄角而自居喀喇沙爾左
右策應以拒官軍吐魯番舊有兩城尚完固海古拉又日
役萬夫堅築王府固自謂有恃無恐也乃官軍一鼓而下

達坂乘勝進攻自度不支白彥虎即棄吐魯番海古拉即棄托克遜蒼黃西遁莫敢支吾宗棠以南八城門戶洞開應即振旅長征以清絕漠令孫金彪留吐魯番加意拊循其同知巡檢等官均刊木質鈴印遴員攝理厥後全疆者定大功告成置省設官興養立教化狂榛為耕鑿易鱗介而冠裳北枕祁連南瞰鹽澤吾民其庶有彜乎

耆舊

回族性與人殊初不識名教綱常之大經數百年撫綏培養頗知喁喁嚮風然聲教雖通文明未啟事業學問舉無可稱同治三年逆回竄擾廳治領隊大臣榮慶守禦旬日卒以民變城陷殉難於此亦未建有專祠至名宦鄉賢向為廳治所未有故與耆舊均闕

人類

廳治自安集延苗帕夏父子竄斃後餘黨皆與白彥虎竄入俄境靡有孑遺收撫後本地纏回及漢裝回以次復業外有漢民牽車販賈流寓此間更無他族偏處